

Malaysia, Singapura & Thailand Tawar Skim Pelaburan Rentas Sempadan Menjelang Enam Bulan Pertama 2014

Bernama

1 Okt, 2013

KUALA LUMPUR, 1 Okt (Bernama) -- Pengurus dana dari Malaysia, Singapura dan Thailand akan dapat menawarkan dana runcit masing-masing secara terus kepada pelabur di ketiga-tiga negara di bawah proses terselaras dalam jangka terdekat ini.

Suruhanjaya Sekuriti Malaysia (SC), Pihak Berkuasa Monetari Singapura (MAS) dan Suruhanjaya Sekuriti dan Bursa (SEC), Thailand hari ini menandatangani satu memorandum persefahaman untuk mewujudkan Kerangka ASEAN CIS untuk mempermudah penawaran Skim Pelaburan Kolektif (CIS) rentas sempadan.

Kerangka yang merupakan inisiatif Forum Pasaran Modal Asean (ACMF) itu sebagai sebahagian daripada rancangan penyepaduan modal serantau, dijangka dilaksanakan dalam enam bulan pertama 2014, katanya dalam kenyataan.

"Ketiga-tiga negara akan mengguna pakai satu set standard yang sama untuk memastikan skim yang ditawarkan diuruskan berdasarkan amalan terbaik industri," kata ACMF, sambil menambah bahawa sebuah buku panduan akan dikeluarkan untuk memberi panduan tentang perkara-perkara berhubung pentadbiran dan prosedur.

Malaysia, Singapura dan Thailand akan juga saling memberikan bantuan untuk mengawal selia tawaran itu kepada pelabur bukan runcit.

Pengerusi SC, Datuk Ranjit Ajit Singh, berkata inisiatif itu sejajar dengan matlamat untuk menggalakkan aliran rentas sempadan serantau yang lebih besar dan untuk membina pengiktirafan jenama Asean sebagai satu kelas aset, dan bergerak selangkah lebih hampir ke arah mencapai rejim pasport Asean.

Sementara itu, Penolong Pengarah Urusan (Kumpulan Pasaran Modal), MAS dan Vorapol Socratyanurak, Setiausaha Agung SEC Thailand, berkata inisiatif itu akan menyepadukan pasaran modal Asean selanjutnya, memperluas peluang-peluang pelaburan dan menambah baik aliran produk dana bagi pengendali dana bersama.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=982217>